



10 Johr

## RIEBLIZUPFER - WAGGIS

**Sujet: Dr Bebbi schwäbt im sibte Himmel  
Trotz em Mirage-Furz und Fimmel!**

Baidi hänn dr glychi Grattel  
 Baidi hogge fescht im Sattel  
 Eb in Frankrych, in dr Schwyz  
 Hesch mit baide s'glychi Kryz! –  
 Dr «KRUUTKOPF» dä het's luusig braicht  
 Me het en ohni z'frooge gspaicht  
 Wär hätt das dänggt, verglepft im Schatte  
 Druff gheersch die altbekannti Platte:  
 «Sit Johre mach y nyt als Saich»  
 Aer sälber dänggt ganz duuch und blaiçh:  
 «Wenn y numme Schwyzer wär  
 Dert schiesst dr Chef vom Militär  
 Au Risebegg, wie jede weiss  
 Und produziert e soo-ne Mais  
 Wo de gar nit frässe kasch  
 Dä derf blybe, lägg mir Aschl!» –  
 Mer wisse, unsre «VAUDOIS BOLLE»  
 Keyt ganz zimpftig uus dr Rolle  
 Und me het dä Her in Bärn  
 Nit ummesunscht nimm bsunders gärn  
 Schliesslig hänggsch aim wo Millione  
 Mit Milliarde mechti flohne  
 Nit e Lorbeerkrantz an d'Kabbe  
 Wenn de froh wärsch, dä däät schnabbe.  
 Was mainsch dä Klotz, bisch ganz betroffe  
 Fir «HUNDERT FLUGI» – sinn die bsoffe?  
 Wenn's aim doo nit fascht verjaggt  
 Soo wärde unsri Stitz verhaggt!  
 Dr Däätel isch trotz Konjunktuur  
 Hitte no dr Schuufle-Buur  
 Eb Sunntig-Wärtig, schwäär z'begriffe  
 Ai Bixe, uus däm Stoff, däm styffe  
 S'zwait Hemmli mues er sälber blääche  
 Statt Lääberli, e Spatz e zääche  
 Mechtsch in's Näscht, hesch ändlig Rueh  
 Ligsch in's Strau, wie jedi Kueh  
 Und wenn's saicht, doo wirsch doch lätz  
 Hesch nit emool e Gummi-Blätz!!! –  
 Pletzlich pfupft's, s'het alles gfunde  
 Jetz syg wirgglig gnueg Hai dunde  
 Me-n-isch en-ainig Volgg vo Brieder  
 Ohni Rytlichwuur und Lieder  
 Eb alt und jung, eb grooss und glai  
 Alles stoht uff d'Hinterbail  
 S'Parlamänt isch bees verstopft  
 Me het's au guet zem Busch usklopft  
 Im Bundeshuus, s'isch nit vergässe  
 Sinn s'erscht Mool alli Sässel bsässe  
 Dr Root nimmt gar kai Blatt vor d'Schnure  
 S'kunnt jede dra, s'schlieft kaine dure  
 S'wird mängge-n-ächte «Briener» gschwunge  
 Und dailwys gobvergässe gsunge  
 De mainsch, dä Volggverträter-Tesch  
 Syg s'rainschti Schwing- und Äplerfescht!  
 Me froggt sich gspanne, was bassiert  
 Wär wird rasiert und wär spediert  
 Gänn si ainewääg Kredit  
 Aifach, doppelt oder nyt? –  
 Aistimmig bschliesst me, kurz und bindig  
 Numme s' M. D. findets windig  
 Die «FURZIDEE» wird reduziert  
 Und nit no äxtra finanziert!  
 De hesch dr Gnuss an däm Entschaid  
 Kai Schwanz, kai Knoche duet aim laid  
 Dr Plebs, dä kaibt noh Härzensluscht  
 Jetz wird gruomt, s'stellt alles d'Bruscht  
 Dr letschti Senn vom Gämpestolle  
 Isch derfir, ass Kepf mien rolle! –  
 Spilt jede FRITZ vo däne FRITZE  
 Wo sälte dief im Gaggo sitze  
 Im Greessewahn und Schmirage-Durscht  
 Die belaidigt Lääberwurscht!!!  
 Freiwillig macht sich kain uff d'Sogge  
 S'fliege zwai, dr Räscht blybt hogge.  
 Dä mit em diggschte Ranzeweh  
 Wo'd wette däätsch, s'isch um en gscheh  
 T's am beschte iberhaue  
 Unhaimlig, was dä mag verdaue  
 Es kennt kai Schoofs- und Kääbermaage  
 Soo vyl fuuli Sprich vertraage  
 S'het mängge Biffel kai soo Huutt  
 S'gitt em au kai Bai dr Schuutt!  
 Piggelhart sitzt d'Hauptfigur  
 Und dänggt als alte Rääbe-Buur  
 Allewyle no als BOSS  
 Frisch frehlig uff em hooche Ross:  
 «PAULI – wärsch dr greeschti Dotsch  
 Wenn de giengsch und gar nit wotsch  
 Und wenn die ganzi Schwyz verdegglet  
 Si wird jo ainewääg versegglet!»

**Am Fasnachts-Zyschtig goht me-n-an  
 d'Ladäärne-n-Uusstellig in dr Kongrässhalle.  
 S'isch offe vo de morg-n-am nynt  
 bis z'nacht am elfi.**